



16. marts 2017

UPA 2017/57

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

1. klassimiik meeqqat atuarfiisa tamarmik pinngitsooratik tuluit oqaasiinik takornartat oqaasiisut atuartitsialernissaat qularnaarumallugu Meeqqat Atuarfiat pillugu Inatsisartut inatsisaannut nr. 15, 3. December 2012-imeersumut allannguutissamik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliniutip tamatuma kinguneranik kalaallit danskillu oqaasiinik atuartitsineq ajornerulersinneqassanngilaq. Allannguut atuutilersinneqassaaq ukiup atuarfiusup 2018-mi aallartinneraniit.

(Inatsisartunut ilaasortaq Nivi Olsen, Demokraatit)

Tunngavilersuut

Kalaallit oqaasii Kalaallit Nunaanni pisortatigoortumik oqaasiupput. Taamaappoq aamma taamaattussaavoq. Kisianni aamma kalaallit oqaasii ikituinnarnit oqaaserineqarput ikittuinnarnillu paasineqartarlutik. Taamaattumik pingaaruteqarpoq kalaallit oqaasiisa saniatigut aamma allat oqaasiinut ilisimasaqarnissaq.

Uangutsinnut Kalaallit Nunaanniittunut pingaaruteqarpoq danskisut tuluttullu oqalulluarsinnaanissarput, taakku oqaatsit atorlugit oqalussinnaanissarput atuarsinnaanissarput aamma allassinnaanissarput. Ungut ataasiakkaarluta ilinnialernissatsinnut kingornalu suliffeqalernissatsinnut periarfissagut pitsanngorsarumallugit.

Piffissanngorpoq sapiissuseqarluni aalajangiinissaq. Ineriartorneq sukkaqaaq. Oqaatsit takornartallu oqaasii sakkuupput aamma takornartat oqaasiinik atuisinnaaneq imaanngilaq, minnerusumik kalaaliusugut. Naamerluinnaq. Imaappoq nunarput pitsaanagerusumut ineriartortikkipput aamma meerartagut pitsaanagerusunik periarfissikkigut. Inuussutissarsiutit soorlu takornariartitsinerup, aalisakkanik tunisassiornerup aamma aatsitassanik avammut tuniniaanerup pisariaqartippaa nunarsuarmioqatitsinnut attaveqarsinnaanissarput taamaattumik pisariaqarpoq kalaallit oqaasiisa saniatigut takornartat oqaasiinik allanik atuisinnaanissarput.

Aamma naammangilaq danskisut piginnaaneqarnissaq. Ilinniagartuunngorniarnerni tamangajanni pisariaqarpoq tuluttut piginnaaneqarluarnissaq, ilinniartitsissutit ilarpassuit tuluttuujummata aamma sulianut atatillugu paasissutissanik misissuinerit nittartakkani tuluttut allannilinni ingerlanneqartarmata.

Kukkunerussaarli tuluttoorneq pingaernerutinneqalissappat danskit oqaasii akigalugit. Akornatsinni amerlanerpaat kulturikkut ilaqutariissutsikkullu Danmarkimut attaveqarpugut aamma tamatta periarfissaqarpugut danskit ilinniarsiinik atuissalluta akeqanngitsumik. Paarilluartariaqarpugut taamaattumik pingaaruteqarpoq danskisut atuartsinerup qaffasissusaata minnerpaamik maannakkutut iinnarnissaa.

Taamaattumik Demokraatit isaannik isigalugu aaqiissutigineqarsinnaavoq tuluttut atuartsinerup annertusinissaa maannakkulli atuartsinermi oqaatsit atorqartartut kalaallisut danskisullu, akiginagit.

Piffissanngorpoq nunami maani kinguaariit aggersut inuunermi periarfissaasa akisussaaffigilernissaat peqataanillu siulitta pilersissimasaat ineriartortissimasaallu ataqqillugit.

Demokraatini naggataatigut kaammattuugissavarput matuma oqallinneq torersumik kusanartumillu ingerlanneqassasoq. Meerartatta siunissaat pivarput.

Partiit allat oqaaseqaatissaannut kiisalu Naalakkersuisut akissuteqarnissaannut qilanaarpugut.

Aningaasatigut allaffissornikkullu pisortanut kingunerusussat

Meeqqat atuarfiat pillugu inatsisip allanngortinissaata inatsisitigut suliassartaa naatsorsuutigineqanngilaq ilinniagartuup qaammatit pingasut sinnerlugit suliariumaaraa taamaattumik allaffissornikkut sinaakkutissaareersup iluani suliarineqarsinnaassasorinarpoq. Tamatuma saniatigut ilinniagassanut pilersaarutit sananeqartussaassapput, tamatumalu suliarinissaa ilinniagartuup suliarisinnaassavaa ukiup sisamararterutaani. Tassa akeqassaaq 250.000 koruunit missaani.

Siunnersuut akuerineqassappat tamatuma kingunereratarsinnaavaa ilinniartitsissutit sananissaannut Landskarsip aningaasartuuteqarnerunissaa. Atuarfitsilaalli eqqunneqarnerani taamatullu 4. klassimi tuluttut ilinniartitsisalerneq peqataanik eqqunneqarmat oqaatigineqarpoq ilinniartitsissutinik sananernut immikkut malunnartumik aningaasartuuteqarnissaaq imatut naatsorsuutigineqanngitsoq¹.

Kommunit eqqarsaatigalugit siunnersuutip kinguneranik pisariaqassaaq tuluttut ilinniartitsissutit amerlineqarnissaat. UKA2011/30-p suliarineqarneranut atatillugu Kulturimut, Ilinniartitaanermut, Ilisimatusarnermut Ilageeqarnermullu Ataatsimiititaliaq isumaliutissiissusiorpoq tassanilu ilaatigut atuarneqarsinnaavoq, 1. klassemiit tuluttut ilinniartitsisoqartalissappat tamatuma kinguneranik tuluttut ilinniartitsisut 175-nik amerlineqartariaqassasut.

Taamanilu Naalakkersuisuusumit aamma tikkuarneqarpoq, atuarfiit angisuut ilinniartitsisooreersut atorsinnaassagaat nunaqarfinnili atorfiit inuttalerneqartariaqassasut ilinniarsimangitsunik timelærerinik. Matumani erseqqissarneqassaaq imaanngimmat ilinniartitsisut 175-t ulloq naallugu sulisartussat atorfinitsinneqassasut.

¹ Meeqqat atuarfiat pillugu Inatsisartut peqqussutaannut nr. 8-mut 21. maj 2002-mmersumut oqaaseqaatit qupperneq 13-miittut takukkit.

Qanoq amerlatigisunik ilinniartitsisut ilassanerannut apeqqutaavoq uuma sinnersuutip kinguneranik qanoq annertutigisumik immikkut atuartitsisarnissaq eqqarsaatigineqarnersoq. Immikkut ilinniartitsisussanut akissarsiatigut aningaasartuuteqartoqassaaq, tamatumalu saniatigut aamma ullumimut naleqqiullugu atorfiit amerlanerusut inuttalernerqarnissaat aningaasartuutitaqassaaq, sualummik illoqarfiit nunaqarfiillu immikkut atorfinitsitsinissamut ajornartorsiuteqartut eqqarsaatigalugit.

Aningaasatigut allaffissornikkullu sullivinnut namminersortunut kingunissai.

Soqanngilaq.

Aningaasatigut allaffissornikkullu innuttaasunut kingunissai

Soqanngilaq.